

## DIDZA' GUSÖL-LË'Ë PABLO YÖDZÖ ROMA

*Pablo rugapë' Dios bönachi queë' Cristo nacu'ë  
Roma*

<sup>1</sup> Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en gurö cazë' neda' para guna' libán que didza' dxi'a queë'.

<sup>2</sup> Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. <sup>3</sup> Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, <sup>4</sup> pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. <sup>5</sup> Ni'a que le benë' Jesucristo ruzí'iru' xibé le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzülió Lë', en ilún ca rnna xtídzë'ë. <sup>6</sup> Bít'sa'li' libí'ili' ládjagaca bönachi yödzülió na', pero na'a nulidzë' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' ládxe'ë queëru', en le ribequi dxi ládxi'ru'.

*Rě'ënë' Pablo tsöjyüë' bönachi queë' Cristo nacu'ë Roma*

<sup>8</sup> Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi iduté yödzölió ca réajlë'ëli' Jesucristo. <sup>9</sup> Idú ládxa'a runa' xichinë' Dios, runa' libán que didza' dxi'a ca naca queë' Zxí'inë'. Nözinë' Dios rulídzatica'sa'-në', en rinábida'-në' gaca tsahui' queëli'. <sup>10</sup> Rinábitica'sida' Dios, channö naca le rě'ënë' Lë', gunnë' neda' lataj uduyúa' libí'ili'. <sup>11</sup> Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzejë' Dios Bö' Lá'ayi queëli', le gun ga gácali' tsutsu. <sup>12</sup> Lë na' rě'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

<sup>13</sup> Böchi' luzá'ado', rě'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Rě'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni. <sup>14</sup> Dë le ralla' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. <sup>15</sup> Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

*Yöl-la' huáca zxön que didza' dxi'a*

<sup>16</sup> Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, rě'ënë' Dios ila'yönnë' bönni' judío le, ate' tödi na'

ila'yöni ca' bönachi izá'a. <sup>17</sup> Didza' dxi'a ni ru-lu'í rē'u gunē' Dios ga huóácaru' tsahui', channö uyéajlë'ëru' Lë', en biti' gaca chopa ládxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

### *Xíguia' nabága'gaca bönachi*

<sup>18</sup> Dios, Nu zoa yehua' yubá, bulu'e lahui biti' rilé'enē' dxi'a yúgu'të le ruá' dö', en le cabí naca tsahui' tun bönachi. Gunē' xíguia' yugu' bönni' na', lu yöl-la' biti' naca tsahui' quégaquiē' ta'dá'baguē'ë le naca idútë li. <sup>19</sup> Caní gaca quégaquiē' tu' nalá' lahui lógaca yúgu'të bönachi le naca bē' zoa cazē' Dios, tu' bulu'í quézinē' Dios lë ni ga na' nacu'ë. <sup>20</sup> Dza ni'te cate' si' guta' yödzölió, ga ridxintë na'a dza, yugu' le nunē' Dios nácagaca bē' le cabí gaca il'éru' queē' Dios, ca naca yöl-la' huáca idú queē', en le naca cazē' Dios. Que lë ni na', biti' gaca ila'nnē' biti' nabága'gaquiē' xíguia'. <sup>21</sup> Cate' ni' gulúnbē'ë Dios, biti' gula'yéaj ládxi'gaquiē' Lë' ca ral-la' tseaj ládxi'ru'-nē' Dios, en biti' gulë' Lë': "Xclenu'." Que lë ni na', cá'asö böáca le gula'zá' ládxi'gaquiē', ate' gula'chul-la gula'nitiē' tu' nazidi icja ládxi'do'gaquiē'. <sup>22</sup> Sal-la' guléquinē' ta'yéajni'inē' yenni', bulu'huóáquiē' bönni' biti' bi nözguequinē' <sup>23</sup> tu' bulu'cá'anē' yöl-la' bení' queē' Dios Nu zóatica'sö, ate' gula'yéaj ládxi'gaquiē' budó' guiöj budó' yaga, budó' na' nácagaca ca yugu' bönni' tati cazē', en ca yugu' böa'do' zoa xíligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

<sup>24</sup> Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu' cá'ana cúngaquië' lu yöl-la' stu' tuë' len ia'túë'. <sup>25</sup> Guca caní tu' bulu' cá'anë' xtídzë'ë Dios, le naca idútë li, ate' gula'zì' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

<sup>26</sup> Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu' cá'ananu yöl-la' rizóalen bönni', para ilunnu le ruá' dö'. <sup>27</sup> Lësca' caní gulunë' yugu' bönni' biguíú', bulu' cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlënë' tuë' ia'túë', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'gu'i gula'záquië' lu xipëla'gaquië' yugu' bönni' gulunë' caní tu' bubí'ë Dios quëgaquië' ca sa'yéaj dul-la' na' gulunë' tu' nucá'anagaquië' Dios.

<sup>28</sup> Tu' cabí gulé'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le bití' naca dxi'a, en ilunë' le cabí nazaca'.

<sup>29</sup> Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídí'në'.

Bití' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zì' yé'enë' bönachi, en zì'të nácagaquië' xihui'.

Ta'nnë' que luzá'agaquië'.

<sup>30</sup> Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácagaquië' bönni' bizzaj.

Tun cuíngaquië' lo, en tun ba zxön cuíngaquië'.

Ta'guiljé' le ruá' dö' iluné', en ta'dá'baguë'ë xuz xiná'agaquië'.

<sup>31</sup> Nácagaquië' bönni' bití' ta'yéajni'iné', en tun dítjagaquië' xtídza'agaquië'.

Biti' nácagaquië' dxi'i ladxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

<sup>32</sup> Nözguequi quéziné' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequiné' lë ni, calégasö caní tuné', pero ta'yaza ládxi'gaquië' nupa tun ca' caní.

## 2

*Naca tsahui' ichúguië' Dios quégaca bönachi gátigaca*

<sup>1</sup> Que lë ni na', bití' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. <sup>2</sup> Nöz quéziru' ca ruchí'a rusöröë' Dios. Naca idútë li ca ruchí'a rusöröë' nupa tun le ruá' dö'. <sup>3</sup> Lí' richugu bë'u nupa tun le ruá' dö', en tuz ca runu' lí'. ¿Naru' réquitsenu' uló' lí' cate' uchi'a usöröë' Dios? <sup>4</sup> ¿Naru' rucá'anatso' cá'asö yöl-la' dxi'i ladxi' idú queë' Dios, en yöl-la' riböza zxön ladxi' queë', en ca runë', ridzenë' para lenë' lí'? ¿Naru' cabí nöz quézinu' ruzá' ládxe'ë Dios quiu' yöl-la' dxi'i ladxi' queë' para gunë' ga ubí'i ládxi'u? <sup>5</sup> Lu yöl-la' ládxi'do' zidi quiu' bití' rubí'i ládxi'u. Que lë

ni na' rusubaga' cuinu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca. <sup>6</sup>La' dza ní'sö ubí'i cazë' Dios que queë' bönni' tsca naca le gulunë' tu tuë'. <sup>7</sup>Unödzejë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. <sup>8</sup>Lu yöl-la' rilé queë', Dios gunë' xíguia' nupa ta'dá'baga', en biti' té'eni ilún ca rnna le naca idútë li, pero tun ca rnna le cabí naca tsahui'. <sup>9</sup>Ila'guí'i ila'záquië', en hu'inida' ládxe'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. <sup>10</sup>Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

<sup>11</sup>Caní uchi'a usöröë' Dios bönachi, ate' Lë' biti' runë' bal le ta'nnasö bönachi. <sup>12</sup>Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. <sup>13</sup>Caní gaca, tu' cabí nácagaquië' tsahui' lahuë' Dios yugu' bönni' ta'yönisë' xibá queë', pero ulu'huöáca tsahui' lahuë' Lë' yugu' bönni' tunë' ca rnna xibá queë'. <sup>14</sup>Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na',

bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. <sup>15</sup> Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'. <sup>16</sup> Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

*Yugu' bönni' judío, en xibá queë' Dios*

<sup>17</sup> Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, <sup>18</sup> nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a. <sup>19</sup> Réquili' gaca uluí'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. <sup>21</sup> Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? <sup>22</sup> Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiöj budó' yaga. ¿Naru' ribántsali' le dzö'ö lu yudo' quéguequi? <sup>23</sup> Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö,

en riguítjsali' xibá le gunná bē'ē Lē'? <sup>24</sup> Nazúaj lu guichi lá'ayi ca runli', rnna: Ni'a que le runlí' libí'ili' nupa biti' nácgaca judío ta'nnē zi' queē' Dios.

<sup>25</sup> Le nácatē ruzi'u xibé lē na' narugu lu xipélu'u le naca bē' nazí' lu ná'ali' xibá queē' Dios channō runu' ca rinná bē' xibá na' queē' Dios, pero channō riguitsju' xibá le gunná bē'ē Lē', nuhuóacu' ca tu bönni' biti' néquinē' queē' Dios. <sup>26</sup> Que lē ni na', channō zoē' tu bönni' biti' narugu lu xipélē'ē lē na' naca bē' nu nazí'i xibá queē' Dios, pero runē' idútē ca rinná bē' xibá queē' Lē', bönni' ni náquiē' lahuē' Dios ca tu bönni' narugu caz lu xipélē'ē lē na' naca bē' sal-la' biti' narugu lu xipéla' cazē'. <sup>27</sup> Bönni' na' biti' narugu lu xipélē'ē lē na' naca bē' nu nazí'i xibá queē' Dios, pero runē' idú ca rinná bē' xibá na' queē' Dios, ca runē' bönni' ni ruluí'i nabága'li' libí'ili' xíguia', sal-la' dē lu ná'ali' xibá na' queē' Dios, en narugu lu xipéla'li' lē na' naca bē' nazí' lu ná'ali' xibá na' queē' Dios, pero biti' runli' ca rinná bē' xibá queē' na'. <sup>28</sup> Biti' náquiē' idú bönni' judío tu bönni' nácasē' caní lu yöl-la' bönáchisō queē', ate' biti' naca idú lē na' naca bē' le narúgusō lu xipélē'ē nu bönni'. <sup>29</sup> Náquiē' idú bönni' judío bönni' na' náquiē' caní lu icja ládxi'da'ahuē', en le naca idú le narugu lu xipélē'ē nu bönni' le naca bē' nu nazí'i xibá queē' Dios, naca tu le yu'u icja ládxi'do'gaca bönachi. Naca que bö' naca cázaru', en calēga que yöl-la' bönáchisō queēru'. Nu bönni' náquiē' caní, biti' tun bönachi lē' bal, pero Dios caz gunē' lē' bal.

### 3

<sup>1</sup> Channō caní naca, ¿bizxi ruzi'tsē' xibé tu bönni'



tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë? <sup>2</sup> Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? <sup>4</sup> ¡Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'zí' yë' yúgu'të bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usörö Li'.

<sup>5</sup> Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." <sup>6</sup> ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzülió ni?

<sup>7</sup> Cate' nu rizi' yë', Dios rnnë' biti' ruí'i didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'zí' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'. <sup>8</sup> ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë' zi' queëru' ta'nná rusédiru' caní, ate' tsahui' naca ichúguië' Dios quéguequi.

### *Yúgu'tëru' nabága'ru' dul-la'*

<sup>9</sup> ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'zica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi

izá'a. ¡Yúgu'tè' nabága'gaquië' dul-la'! <sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'i.

Cuntu nu riguila'j Dios.

<sup>12</sup> Yúgu'tè' ta'dé' ga yúbölö.

Yúgu'tè' nanítigaquië'.

Cuntu nu run le naca dxi'a, cuntu nu caz.

<sup>13</sup> Lubá'agaquië' nácagaca ca yeru ba nayáljagaca.

Len yöl-la' rinnësö quégaquië' ta'zi' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

<sup>14</sup> Len yugu' didza' tu'ë, tu'didza' yúdxinë' bönachi, en ta'nnë zi'ë quégaca bönachi na'.

<sup>15</sup> Nacu'ë sina' tútigaquië' bönachi.

<sup>16</sup> Gátitës ga ta'dödë' tu'sunítie', en tu'saca' zi'ë luzá'agaquië'.

<sup>17</sup> Biti' ta'zéqui'në' ila'bözë' dxi'ado'.

<sup>18</sup> Biti' ca' tádxinë' Dios.

<sup>19</sup> Nöziru' yúgu'tè' didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'tè' bönachi idútë yödzölió, uchi'a usöröë' Dios quéguequi. <sup>20</sup> Tu'i ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

*Uláru' tu' réajlë'ëru' Jesucristo*

<sup>21</sup> Na'a, chibulu'i lahui ca gaca huóácaru' tsahui' lahuë' Dios. Biti' gaca huóácaru' tsahui' tu'

runru' ca rinná bē' xibá queē' Dios, sal-la' lu xibá queē' na', en lu guichi lá'ayi ga nazúajgaca le gula'nnē' bōnni' gulu'ē didza' uláz queē' Dios, ru'í didza' ca gaca huóácaru' tsahui'. <sup>22</sup> Dios caz runē' ga huóácaru' tsahui' tu' réajlë'ëru' Jesucristo, ate' gunē' ga ulu'huóáca tsahui' yúgu'të nupa ila'yéajlë' Lë'. Tuz ca nácagaca yúgu'të bōnachi <sup>23</sup> tu' núnagaquiē' yúgu'të dul-la', en biti' ca' nácagaquiē' tsahui' ca na' náquiē' Dios idú tsahui'. <sup>24</sup> Dios ruzá' ládxe'ē queëru', en nunsē' rē'u tsahui' tu' böá'uē' Jesucristo rē'u. <sup>25</sup> Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bē' náquiē' tsahui' Lë' sal-la' lu yöl-la' riböza zxön ladxi' queē' budödisë' cá'asö yugu' dul-la' benru' dza ni'te. <sup>26</sup> Caní benë' Dios, bulufí' cuinë' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bōnachi, runē' ga tu'huóáca tsahui' nupa ta'yéajlë' Cristo.

<sup>27</sup> ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bē' xibá queē' Dios, pero tu' réajlë'ësiru' Jesucristo. <sup>28</sup> Na'a, rusáca'ru' queëru' nuhuóáquiē' tsahui' tu' bōnni' tu' réajlë'ë Jesucristo, en calëga tu' runē' ca rinná bē' xibá queē' Dios.

<sup>29</sup> Ca naca Dios, ¿náquiē' Dios quégacasö bōnachi judío? ¿Naru' cabí náquiē' ca' Dios quégaca bōnachi izá'a? Ön, náquiē' ca' Dios quégaca bōnachi izá'a na' <sup>30</sup> tu' zoa Tuz Nu naca Dios. Dios ni gunē' ga ulu'huóáquiē' tsahui' yugu' bōnni' judío tu' ta'yéajlë'ë Jesucristo, yugu' bōnni' na' narugu lu

xipéla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipéla'gaquië' lë na' naca bë'. <sup>31</sup> Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

## 4

### *Le benë' Abraham rusedi rë'u*

<sup>1</sup> ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le riguízxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'. <sup>5</sup> Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácgaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'. <sup>7</sup> Caní gunné' David:

¡Bica' ba bönni' na' Dios runiti lahuë' le biti' naca tsahui' nunë',  
en rugüë' yugu' dul-la' nabáguë'ë!

<sup>8</sup> ¡Bica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

9 ¿Naru' nácagacsë' bica' ba bönni' narugu lu xipéla'gaquië' lë na' naca bë', o nácagaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. 10 ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'alö? Biti' guca cate' chinarugu lu xipélë'ë, pero zí'alö guca. 11 Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'ísö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'. 12 Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

*Le guzxí' lu në'ë Dios gata' queëru' tu' réajlë'ëru' Lë'*

13 Guzxí' lu në'ë Dios bi unödzjë' queë' Abraham, en quégaca zxí'ini xi'sóë', gata' quégaquië' la' yödzölió nisö. Gaca caní, caléga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'. 14 La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios. 15 Rulu'í

xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' bití' ridxini xibá queë' na', bití' gaca ila'dá'bage' bönachi le rinná bë' xibá na'.

<sup>16</sup> Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. <sup>17</sup> Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu bití' zuíni tsca chizóa caz nu na' bití' zuíni.

<sup>18</sup> Caní naca tu' gudxë' Dios Abraham na': "Ziántërö ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' bití' guca ilé'enë' lë na' runë' löza, ate' caní guca, bidélinë' náquië' xúzgaca bönachi idútë yödzölió. <sup>19</sup> Bití' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx. <sup>20</sup> Bití' guca chopá ládxë'ë, en bití' gúquië' tu' caréajlë' ca naca le guzxí' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba. <sup>21</sup> Idú ládxë'ë benë' löza Dios, napë' yöl-la' huáca gunë' idútë lë

na' guzxi' lu në'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, <sup>24</sup> pero para uzí'iru' xibé ca' rë'u. Rë'u ni, Dios gunë' ga huöácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huöácaru' tsahui' lahuë' Lë'.

## 5

*Le rata' queëru' tu' rnnë' Dios nuhuöácaru' tsahui'*

<sup>1</sup> Na'a, rnnë' Dios nuhuöácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuöácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. <sup>3</sup> Calégasö caní rudzéjaru', pero rudzéjaru' ca' cate' riguí'i rizáca'ru', tu' chinóziru' le riguí'i rizáca'ru' rusedi rë'u cözaru' zxön ladxi'. <sup>4</sup> Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. <sup>5</sup> Cate' runru' löza Lë', biti' ca' raca chopá ládxi'ru'. Caní naca, tu' nuhuöaj nudzë'e icja ládxi'do'oru' yöl-la' nadxi'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

6 Cate' ni' biti' ca' guca uláru' rácasö queëru', cate' gúlá'rö dza queë', Cristo gútië' uláz queëru', ni' nácaru' bönachi dul-la'. 7 Cuntu nu guë'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxi'a. 8 Dios rulu'ine' rë'u ca nadxi'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. 9 Chinuhuöácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. 10 Cate' ni' biti' rilé'eru'-në' Dios dxi'a, gútië' Zxi'ine' Dios uláz queëru' para huöácaru' tuz len Lë'. Na'a, tu' zoë' nabanë', en chinuhuöácaru' tuz len Lë', chinácada' löza uláru'. 11 Rudzéjaru' lahuë' Dios ni'a que le benë' Xanru' Jesucristo, tu' nuhuöácaru' tuz len Dios ni'a que lë na' benë' Lë'.

### *Le benë' Adán, en le benë' Cristo*

12 Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöla' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. 13 Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. 14 Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxi'ini xi'sóë'. Lë ni rulu'í rë'u ca ilaca tuz len Cristo yúgu'të nupa ila'yéajlë' Lë'.



15 Le rúnнасë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxë'ë queëru' Dios, en le rúnнасë' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo. 16 Le rúnнасë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huóácaru' tsahui' lahuë' Lë' sal-la' nabágaru' dul-la' zían. 17 Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóaca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóaca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. 19 Bulu'huóaca huen dul-la' bönachi zían tu' cabí benë' tuzë' bönni' ca rna xtídzë'ë Dios. Lësca' caní ulu'huóaca tsahui' bönachi tu' benë' yetuzë' Bönni' na' ca rna xtídzë'ë Dios.

20 Guyú'u xibá queë' Dios yödzölió ni para gaca bë'da' nabágaru' gaca bönachi dul-la'. Tu' guca bë'rö nabágaru' gaca dul-la', guca bë'rö ca' zxöntërö naca le buzá' ládxë'ë Dios quégaca bönachi. 21 Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán

idú queëru' ni'a que le benë' Xanru' Jesucristo.

## 6

*Naca tsca chinátiru' para cabirö gunru' dul-la' tu' nabániru'-në' Jesucristo*

<sup>1</sup> ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxe'è Dios queëru'? <sup>2</sup> ¡Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? <sup>3</sup> ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'í rë'u chigudódiru' lu yöl-la' guti tsözxön len Lë'. <sup>4</sup> Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u nubánlenru'-në' Jesús tsözxön para gácaru' bönachi idútë cubi queë'.

<sup>5</sup> Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'. <sup>6</sup> Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönachi queëru' na' bénlenru' le dul-la', para cabirö inná be'e le naca dul-la' rë'u. <sup>7</sup> Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. <sup>8</sup> Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön, <sup>9</sup> tu' chinöziru' bubanë' Cristo lu yöl-la' guti, en bíti'rö gátië'. Que lë ni na' bíti'rö bi gaca gun yöl-la' guti na' queë' Lë'. <sup>10</sup> Ca na'

guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. <sup>11</sup> Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

<sup>12</sup> Que lë ni na', biti' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládxi'li' le ruá' dö', lu le naca cázali'. <sup>13</sup> Biti' udödi cuinli' lu dul-la', biti' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a. <sup>14</sup> Biti' gü'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxë'ë queëru'.

*Le rucudzu' didza' ca naca que nu bönni' nadó'o*

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxë'ë Dios rë'u? ¡Biti' ca' gunru' caní! <sup>16</sup> Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huöácali' tsahui'. <sup>17</sup> Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuöácali'

ca yugu' bönni' nadó'ogaca lu na' le naca dxi'a.  
<sup>19</sup> (Ru'ílēna' libí'ili' didza' ca tuí'i didza' bönachi, tu' cabí réajni' ili' idútē lu yöl-la' bönachi queéli'.) Zí'alö budödi cuinli' len idútē le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu né'eguequi, en benli' xichini le ruá' dö' na'. Na'a, guli'dödi idútē le naca cázali' lu na' le naca tsahui', para gácali' ca yugu' bönni' nadó'ogaca lu nē'e, en gunli' xichini lē na' naca tsahui' para gácali' bönachi narúajgaca quez queē' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'.  
<sup>21</sup> Na'a, ¿naru' buzí'itsali' xibé lē na' benli' zí'alö? Na'a lē na' benli' run ga rutuí'ili', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queē' Dios, en ruzí'ili' xibé le run ga nácali' bönachi narúajgaca quez queē' Dios, en le run ga dē queéli' yöl-la' na'bán idú.  
<sup>23</sup> Lazxaj nu run dul-la' naca yöl-la' guti, pero le rúnнасé' Dios queéru' naca yöl-la' na'bán idú, le rata' queéru' tu' nácaru' tuz len Xanru' Jesucristo.

## 7

### *Le rucudzu' didza' yöl-la' nutsaga na'*

<sup>1</sup> Böcha'ado', núlöli' núnbē'ēli' xibá queē' Dios. Nöz quézili' rinná be'e xibá na' nu bönni' tsanni ni zoē' nabanē'. <sup>2</sup> Naca queéli' ca naca que tu nigula nutsaga ná'lennu-nē' bönni', yú'unu lu nē'ē bönni' queēnu tsanni ni zoē' nabanē' ca rinná bē' xibá que yöl-la' nutsaga na', pero channö chinátie', nurúajnu lu na' xibá na'. <sup>3</sup> Caní naca, tsanni ni zoē'

nabanë' bönni' queënu, channö utsaga ná'lennu-në' ia'túé' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, bití' gunnu dul-la' le riguitsaj xibá que yöl-la' nutsaga na'.

<sup>4</sup> Lësca' caní raca queëli', böcha'a. Tu' dzágali-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxe'ë Dios. <sup>5</sup> Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxin lu idútë le naca cázaru' para ilún ga gátiru'. <sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runné' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

### *Le dzaga neda' le naca dul-la'*

<sup>7</sup> ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Bití' ca' run caní! La'tu' cabí buzéajni'i le rinná bë' xibá na' neda', bití' gunözda' naca dul-la' le runa'. La'tu' cabí zoa lu xibá na' le rna: "Bití' së ládxi'u le dë que luzó'o", bití' gunözda' naca dul-la' yöl-la' rizë ladxi' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizë ládxa'a yúgu'të le ruá' dö'. Ga bití' ridxini xibá na', bití' naca bë' le naca dul-la'.

<sup>9</sup> Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

<sup>12</sup> Que læ ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. <sup>13</sup> ¿Naru' bentsö læ na' naca dxi'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin læ na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

<sup>14</sup> Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. <sup>15</sup> Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' læ na' ré'ënda' guna'. Le naca dul-la' le cabí rilé'eda' dxi'a, læ na' runa'. <sup>16</sup> Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que læ ni na' naca bë'da' naca dxi'a le rinná bë' xibá na'. <sup>17</sup> Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nözda' biti' zóalen neda' le naca dxi'a, o huáca innía', læ na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' læ na' naca dxi'a. <sup>19</sup> Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. <sup>20</sup> Que læ ni na',

channö runa' dul-la' na' biti' rě'enda' guna', calęga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queėru' yúgu'tėru'. Cate' rě'ėniru' gunru' le naca dxi'a, dzaga rė'u le run ga runru' le ruá' dő'. <sup>22</sup> Lu icja lądxi'da'ahua' raza lądxa'a xibá queė' Dios <sup>23</sup> pero réquibe'eda' dzaga idútė le naca' le rinná be'e neda', ate' lė ni ridá'baga' xibá queė' Dios yu'u icja lądxi'da'ahua'. Lė na' dzaga idútė le naca' run ga runa' dul-la'.

<sup>24</sup> ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? <sup>25</sup> ¡Xclenė' Dios, chinularu' na'a ni'a que le benė' Xanru' Jesucristo! Que lė ni na', tsca naca le yu'u icja lądxi'da'ahua' runa' ca rinná bė' xibá queė' Dios, sal-la' yöl-la' bönáchisö quia' run ga rě'enda' guna' dul-la'.

## 8

### *Le runru' tu' zóalenė' Dios Bő' Lá'ayi rė'u*

<sup>1</sup> Que lė ni na', bítirő bi xíguia' nabága'gaquiė' yugu' bönni' néquiguequinė' queė' Jesucristo, bönni' na' bítirő tunė' ca rě'ėni yöl-la' bönáchisö quėgaquiė', pero ca rě'ėnė' Dios Bő' Lá'ayi tunė'.

<sup>2</sup> Tu' naca' tuz len Jesucristo, Dios Bő' Lá'ayi, Nu na' nabániru', rácalenė' neda'. Que lė ni na', nulá' lu lė na' ben ga bena' dul-la', enca' lu yöl-la' guti.

<sup>3</sup> Chinunė' Dios le cabí guca gun xibá na', tu' cabí bi guxzėqui' gun tu' nácaru' bönáchisö. Dios gusöl-lė'ė Zxí'ini cazė', ate' guljė' bönachi ca nácaru' rė'u, nácaru' bönachi dul-la', pero biti' bi dul-la' benė' Lė'. Busubaga' cuinė' dul-la' nabága'ru' rė'u, ate'

caní guca, guchúguië' que dul-la' runru' lu yöl-la' bönáchisö queëru'. <sup>4</sup> Caní benë' para gaca gunru' idútë le naca tsahui' le rinná bë' xibá queë', núlöru' na' bíti'rö runru' ca ré'ëni yöl-la' bönáchisö queëru', pero ca ré'ënë' Dios Bö' Lá'ayi runru'.

<sup>5</sup> Bönni' tunë' ca ré'ëni yöl-la' bönáchisö queégaquië', tuí'i ládxi'gaquië' le naca que yöl-la' bönáchisö queégaquië', pero bönni' tunë' ca ré'ënë' Dios Bö' Lá'ayi, tuí'i ládxi'gaquië' le naca queë' Dios Bö' Lá'ayi. <sup>6</sup> Channö ruí'i ládxi'siru' le naca que yöl-la' bönáchisö queëru', tsaz gátiru', pero channö ruí'i ládxi'ru' le naca queë' Dios Bö' Lá'ayi, chidë yöl-la' na'bán idú queëru', en ribözaru' dxi ladxi'. <sup>7</sup> Núti'tës nu ruí'i ládxi'sö le naca que yöl-la' bönáchisö que, bití' rilé'e Dios dxi'a, tu' cabí run nu na' ca rinná bë' xibá queë' Dios, en bití' ca' gaca gun caní. <sup>8</sup> Que lë ni na', bönni' na' tunë' ca ré'ëni yöl-la' bönáchisö queégaquië' bití' gaca ilunë' le raza ládxi'ë Dios.

<sup>9</sup> Na'a, bíti'rö runli' ca ré'ëni yöl-la' bönáchisö queëli', pero runli' ca ré'ënë' Dios Bö' Lá'ayi tu' zóalen cazë' Lë' libí'ili'. Tu bönni' bití' zóalenë' Dios Bö' Lá'ayi lë', Nu na' risöl-lë'ë Cristo queëru', bití' néquinë' queë' Cristo. <sup>10</sup> Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. <sup>11</sup> Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

<sup>12</sup> Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para



cabirö gunru' ca rě'eni yöl-la' bönáchisö queëru' na'. <sup>13</sup> Channö runli' ca rě'eni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

<sup>14</sup> Yúgu'të nupa tun ca rě'ënë' Dios Bö' Lá'ayi nácacaga zxí'inë' Dios. <sup>15</sup> Dios Bö' Lá'ayi na' zóalenë' libí'ili' bití' nuzóë' libí'ili' leyúbölö ca bönni' nadó'ogaca para gadxi idzöbili', pero chinnunë' ga nácali' zxí'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. <sup>16</sup> Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxí'inë' Dios. <sup>17</sup> Channö chinácaru' zxí'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí'i rizáca'lenru'-në' tsözxön Cristo para uzí'iru' xibé tsözxön len Cristo yöl-la' zxön queë' Dios.

<sup>18</sup> Runi neda', yugu' lë ni riguí'i rizáca'ru' na'a naca tu le cuídi'do'os tsca naca yöl-la' zxön na' gata' queëru' dza si' za'. <sup>19</sup> Ta'böza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' nácacaguië' zxí'ini cazë'. <sup>20</sup> Yúgu'të lë na' nunë' Dios gula'dödi lu na' le run ga ila'niti, calëga tu' gulë'eni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', <sup>21</sup> ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yöl-la' rusölá le nazáca'da' na' ulu'zi'ë xibé yugu' zxí'inë' Dios. <sup>22</sup> Nöziru' ta'guí'i ta'zaca' yúgu'të le nunë' Dios ga ridxintë

na'a dza, ca na' riguí'i rizáca'nu tu nigula chizóa sóabi' b'ído' queënu. <sup>23</sup> Riguí'i rizáca'a, calëgasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'i rë'u ca ral-la' gaca cázaru'. Riguí'i rizáca'ru' tsanni ni ribözaru' dza ni' ulu'ë lahui Dios nácaru' idú xzí'inë', dza ni' únë' ca' idútë le naca cázaru'. <sup>24</sup> Tu' runru' löza lë ni, nuláru' rë'u, pero channö gaca ilé'eru' lë na' runru' löza, biti' naca tu le ribözaru'. Biti' ribözaru' le chirilé'eru'. <sup>25</sup> Na'a, channö runru' löza tu le cabí gaca ilé'eru', lu yöl-la' riböza zxön ladxi' ribözaru' le.

<sup>26</sup> Lëasca' caní rácalenë' Dios Bö' Lá'ayi rë'u cate' rudú ládxi'ru', tu' cabí nöziru' bi ral-la' inábiru'në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxi'ë, tsca cabí gaca nu inná. <sup>27</sup> Dios ruyúë' le yu'u icja ládxi'do' gaca bönachi, en nözinë' le ré'ënë' innë' Dios Bö' Lá'ayi na', ate' Lë', ca ré'ëni quëzinë' Dios, rudödë' xtídza' gaca nupa néquiquequi quez queë' Cristo lahuë' Dios.

*Nadéli'tëröru' tu' zóalenë' Cristo rë'u*

<sup>28</sup> Nöziru' tu'zi'ë xibé bönni' yúgu'të le raca quégaquië', bönni' na' nadxí'iguequinë' Dios, ate' bulidzë' Dios légaquië' ca nuzóa cazë' gunë'. <sup>29</sup> Yugu' bönni' na' gurö cazë' queë' Dios zí'atëlö, buzóë' ca' quégaquië' zí'atëlö ilácagaquië' ca naca cazë' Xzí'inë', para gáquië' Xzí'inë' lo ladaj zían böchë'ë. <sup>30</sup> Nupa na' buzóë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxön queë'.

31 ¿Bizxi caz innaru' na'a ca náca gaca lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'. 32 Dios, idú ládxeë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë? 33 ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'? 34 ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queëru' lahuë' Dios! 35 Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u:

sal-la' riguí'i rizáca'ru', o sal-la' risëbi ládxi'ru',  
o sal-la' ta'bía ládxi'gaca bönachi rë'u,  
o sal-la' ridunru', o sal-la' riyadzaj le gácuru',  
o sal-la' zoa bönadxi queëru', o sal-la' ilútië' bönni  
rë'u.

36 Ca náca gaca lë ni nazúaj lu guichi lá'ayi, rnna: Tu' néquitu' quiu' Li', túntica'sö bönachi ga gátitu'. Nácatu' ca yugu' bö'cu' zxila', nadödígacaba' lu na' nu guti lé gacaba'.

37 Na'a, tu' zóalen rë'u Nu na' nadxí'i rë'u, nácatërö löza idéli'ru' lu le raca queëru'. 38-39 Que lë ni na' runi neda':

Bití' bi sequí' gun ga bítí'rö idxí'inë' Dios rë'u.  
Nadxí'inë' rë'u tu' néquiru' queë' Xanru' Jesucristo.  
Bití' sequí' gun caní yöl-la' guti o yöl-la' na'bán,  
o yugu' gubáz lá'ayi o nupa ta'nná bë',  
o yugu' yöl-la' huáca que tu' xihui',  
o bítí'tës bi zoa o bítí'tës bi si' za',

o tu le dē xitsá'alö o tu le dē cadxí'ilö,  
o bítí'tēs bi nunē' Dios.

## 9

### *Dios gurö cazē' queë' bönachi Israel*

<sup>1</sup> Ruá'a didza' idütē li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¡Bití' rizi' yē'a!  
<sup>2</sup> Ruhuí'inide'eda', en risébitica'sö ládxa'a <sup>3</sup> tu' raca ládxa'a guna' ga ulu'lé' böchi' luzá'a, bönni' uládz quia'. La'tu' huácalen légaquië', guë'eni quézida' ubéaj ládxe'ë Dios neda', en ulá'alena' Cristo. <sup>4</sup> Yugu' bönni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazē'. Yöl-la' zxön queë' Dios guzóalen légaquië', ate' Dios budödē' lu ná'agaquië' didza' rucá'ana tsahui', enca' xibá queë'. Bulidzē' légaquië' para tseaj ládxi'gaquië' Lē', ate' budödē' lu ná'agaquië' yugu' le guzxí' lu në'ë gunē' le ilún tsahui' bönachi. <sup>5</sup> Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljē' Cristo, Nu naca caz Dios, en rinná bé'enē' yúgu'tē. ¡Rácatica'sö queë' yöl-la' ba! ¡Ca' gaca!

<sup>6</sup> Sal-la' yúgu'tē bönni' uládz quia' bití' nazí' lu ná'agaquië' Cristo, bití' ral-la' innaru': Nítisö böáca xtídzē'ë Dios. Calëga yúgu'tē zxí'ini xi'sóë' Israel nácagaquië' idú bönachi Israel, nupa néquiguequi queë' Dios. <sup>7</sup> Sal-la' gúljagaquië' zían zxí'ini xi'sóë' Abraham, bití' guláquië' yúgu'tē' idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." <sup>8</sup> Caní naca, nupa nácagaca zxí'inē' tu bönni'

néquinë' queë' Dios, calëga yúgu'të' nácagaquië' xzí'inë' Dios. Lësca' caní, nácagaca idú xzí'ini xi'sóë' Abraham núpasö na' náljagaca ni'a que lë na' guzxí' lu në'ë Dios. <sup>9</sup> Lë na' guzxí' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

<sup>10</sup> Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', <sup>11-13</sup> cate' ni' si' iláljabi', en biti' bi' núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chígurö cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

<sup>14</sup> ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní! <sup>15</sup> Dios gudxë' Moisés, gunné': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a." <sup>16</sup> Que lë ni na', biti' raca caní ni'a que le të'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi. <sup>17</sup> Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödölió le naca' neda'." <sup>18</sup> Caní naca, Dios ruhuéchi' ládxe'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ëne'

gunë' zidzaj icja ládxi'da'ahuë' bönni' na', ca na' benë' queë' Faraón na'.

<sup>19</sup> Na'a guiëli' neda': "Channö caní naca, ¿bixz que rusubáguë'ë Dios bönachi xíguia'? ¿Nuzxi caz gaca tá'baga' le ré'ëni quézinë' Dios gunë'?" <sup>20</sup> ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bixz que benu' neda' caní?" <sup>21</sup> ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga bití' naca liná'?

<sup>22</sup> Ré'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' guléné' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítie' légaquië'. <sup>23</sup> Caní runë' Dios para gaca bë' nácatëro lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzóë' quégaquië' zí'atëlö ulu'zi'ë xibé yöl-la' zxön queë'. <sup>24</sup> Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a. <sup>25</sup> Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa bití' náca gaca bönachi quia',  
gu'a láguequi: Bönachi quia',  
ate' nupa na' bití' bidxí'ida',  
gu'a láguequi: Nupa nadxí'ida'.

<sup>26</sup> La' ná'asö ga gunnía' quéguequi:  
"Bití' nácali' bönachi quia'",  
si' láguequi: "Yugu' zxí'inë' Dios ban."

27 Na'a, ca naca quégaca zxí'ini xi'sóë' Israel, Isaías gunnë':  
 Sal-la' ìla'yanë' zxí'ini xi'sóë' Israel,  
 en iláquië' tsa naca yuzxi tu ra' yegu zxön,  
 ulu'lë' nabábasë'.

28 Xanru' Dios la' guntë' ga gaca idútë  
 lë na' ichúguië' quégaca bönachi yödzölió ni.

29 Lëasca' caní Isaías bë'ë didza' zí'atëlö, gunnë':  
 Dios, Xanru' unná bë' idú,  
 la'tu' cabí bucá'anë' queëru' yugu' zxí'ini xi'sóaru',  
 ugá'anaru' ca yödzö Sodoma, en yödzö Gomorra,  
 yugu' yödzö na' busunítië' Dios.

*Bönachi Israel, en didza' dxi'a*

30 ¿Bizxi caz innaru' na'a? Yugu' bönni'  
 biti' nabábagaquië' Israel chibila'déli'në'  
 nuhuöácagaquië' tsahui' lahuë' Dios, en biti'  
 gulunë' bayudxi ulu'huöáquië' tsahui' lahuë' Dios,  
 pero nuhuöácagaquië' tsahui' tu' ta'yéajlë'ë Dios.

31 Na'a, sal-la' gulunë' bayudxi yugu' bönni' Israel  
 ilunë' ca rinná bë' xibá queë' Dios, le ral-la' gun ga  
 ilácagaquië' tsahui', biti' bila'déli'në' le ral-la' gata'  
 quégaquië' tu' tunë' ca rinná bë' xibá na'. 32 ¿Bizx  
 que na' guca caní? Caní guca, tu' cabí gulunë'  
 caní lu yöl-la' réajlë' quégaquië' Dios, pero rácasö  
 quégaquië' gulë'ënnë' ilunë' ca rinná bë' xibá na',  
 ate' que lë ni na' gula'chíxinë', o huáca innaru':  
 Yöjchëgu'gaquië' lu lë na' nazí'i le: Guiöj Ga Nu  
 Röjchegu'. 33 Ca naca lë ni nazúaj lu guichi lá'ayi,  
 rnna:

¡Buli'yú! Uzóa'-në' yödzö Sión bönni' na'  
 gáquië' ca tu guiöj ga nu tsöjchegu',  
 guiöj na' gun ga nu ichixi inigui.  
 Nu tséajlë' Lë', biti' ca' utuí'i nu na'.

## 10

<sup>1</sup> Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lé'. <sup>2</sup> Runa' ba nalí quégaquië', idú ládxi'gaquië' tuí'i ládxi'gaquië' Dios, pero calëga len yöl-la' réajni'i idú. <sup>3</sup> Biti' nözguequinë' ca runë' Dios, runsë' ga nácaru' tsahui', pero té'ënnë' ilún cuíngaquië' tsahui' rácasö quégaquië', en biti' ta'cu'ë nōxaj ladxi' lahuë' Dios para gaca gunë' légaquië' tsahui'. <sup>4</sup> Budxi benë' Cristo le rë'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

<sup>5</sup> Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní." <sup>6</sup> Na'a, ca naca que nu huóaca tsahui' tu' réajlë' Dios, rnna caní: "Biti' innó' lu icja ládxi'do'o, bití' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo, <sup>7</sup> en bití' innó': "¿Nuzxi caz huötaj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti. <sup>8</sup> Na'a, ¿bizxi caz rnna? Caní rnna: "Gala' ga zu' zoa caz xtídzë' Dios. Lu ru'u, en lu icja ládxi'do'o zoa xtídzë' na'." Lë ni naca didza' que le réajlë'ëru' Dios runtu' libán que, rnnatu': <sup>9</sup> "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'." <sup>10</sup> Lu icja ládxi'do'oru' réajlë'ëru' Jesús para gácaru' tsahui', ate' len didza' ruí'iru', ruluí'iru' lahui le náquië' Jesucristo para uláru'.

<sup>11</sup> Nazúaj lu guichi lá'ayi le rnna: "Biti' ca' ulu'tuí'i yúgu'të nupa ta'yéajlë' Lë'." <sup>12</sup> Dios, la'



tuz ca ru'í ládxe'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xángaquië' yúgu'të', en nápadë'ë bi unödzejë' quégaca yúgu'të nupa tu'lidza Lë'. <sup>13</sup> Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." <sup>14</sup> ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán lógaquië'? <sup>15</sup> ¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' röjéngaquië' libán que le ribequi dxi ládxi'ru', en tunë' libán que didza' dxi'a."

<sup>16</sup> Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" <sup>17</sup> Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

<sup>18</sup> Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna: Idútë yödzölió bila'yöni chí'igueti. Yúgu'të lataj bila'dxín xtídza'gueti.

<sup>19</sup> Lëasca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné': Gun caza' ga uzxé'eli', tu' idxi'ida' bönachi biti' nabábagaca libí'ili'. Ni'a quégaca bönachi cabí ta'yéajni'i guna' ga leli'.

<sup>20</sup> Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné': Bila'dzöli neda' nupa biti' gula'guílaj neda'.

Bulu'i lahua' lógaquië' bönni' biti' bi gula'nábinë neda'.

<sup>21</sup> Na'a, ca naca quégaquië' bönni' Israel, Isaías na' bë'e didza' uláz queë' Dios, gunné': "Idú dza buli na'a, bulidza' bönachi biti' túngaca ca rnna xtídza'a, en ta'dá'baga' neda'."

## 11

### *Nupa nulágaca ladaj bönachi Israel*

<sup>1</sup> Na'a rnniá': ¿Naru' nusán nëë Dios bönachi Israel? ¿Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' di'a dza queë' Benjamín, xzí'ini cazë' Israel na'.

<sup>2</sup> Dios biti' nusán nëë bönachi queë', nupa na' guró cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' tē'ënnë' ilútië' ca' neda'."

<sup>4</sup> Na'a, ¿bizxi didza' bubí'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu xzíbigaquië' lo budó' guiöj na' nazí'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxe'ë caní quégaquië'.

<sup>6</sup> Channö naca le ruzá' ládxe'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxe'ë queëru' Dios bíti'rö gaca tu le ruzá' ládxe'ë queëru'.

<sup>7</sup> ¿Bizxi caz innaru' na'a? Lë na' gula'guíljë' bönni' Israel, biti' bila'déli'në', pero chibila'déli' le

nupa ni' gurõ cazë' queë' Dios, ate' ia'zícá'rë' na', Dios benë' zidi icja ládxi'do'gaquië'. <sup>8</sup> Ca naca lë ni nazúaj lu guichi lá'ayi, rna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. <sup>9</sup> Ca naca lë ni bë'ë ca' David didza', gunné':

Yugu' laní quégaquië' ulu'huóaca le ila'zön légaquië',  
 en ca tu yalaj ga ila'rölinë'.  
 Ilaca ca' le ilún ga ila'chíxinë',  
 en ca tu le uzí' lëbi légaquië'.

<sup>10</sup> Ila'chul-la guiõj lógaquië', para cabí ila'lé'enë'.  
 Ila'yechu tsaz cúdzu'gaquië' tu' ilu'ë yua'.

*Ca gaca ulu'lágaca bönachi bití' náca gaca judío*

<sup>11</sup> Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Bití' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' náca gaca judío para gunë' ga ulu'zxé'enë' yugu' bönni' judío léguequi.

<sup>12</sup> Le gulunë' bönni' judío, gula'chíxinë', ben ga bidxín quégaca bönachi yödzölió ni le naca ca tu yöla' tsahui'. Channö caní guca, guta' yöla' tsahui' quégaca nupa bití' náca gaca judío tu' gula'nítië' yugu' bönni' judío, zxöntërö gaca le gata' quéguequi cate' yugu' bönni' judío na' ulu'huóáquië' queë' Dios.

<sup>13</sup> Na'a rea' libí'ili' bití' nácali' judío, rnnía': Tu' naca' gubáz nasöl-lë'ë Dios lógaca nupa bití' náca gaca judío, runa' zxön lë na' dë lu na'a

<sup>14</sup> para nadxi ca' huáca guna' ga ulu'zxé'enë' bönni'

uládz quia' libí'ili', en caní guna' ga ulu'lé' bal-lé'. <sup>15</sup> Channö bulu'huöáca bönachi nacuá' idú yödzölió queë' Dios tu' bulu'nítië' yugu' bönni' judío xilátjagaquië', zxöntërö gaca le gata' quéguequi cate' ulu'huöázië' xilátjagaca cazë' na'. Gaca ca raca cate' tu'bángaca nupa chinátigaca. <sup>16</sup> Channö rigú'uru' quez queë' Dios cúa nílado' rubéajru' zí'aló, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

<sup>17</sup> Nácagaquië' bal-lé' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guía, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. <sup>18</sup> Que lë ni na', biti' gun ba zxön cuinli', biti' uzóali' tsölá'aló nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

<sup>19</sup> Nadxi ca' innó: "Gula'rugú ni'a në'e yaga na' para gaca tsázia' neda' xilátjagaca." <sup>20</sup> Nácate didza' ru'u, pero gula'rúguië' tu' cabí gula'yéajlë'ë, ate' yöjtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios. <sup>21</sup> Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' li'? <sup>22</sup> Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácate rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. <sup>23</sup> Lësca' caní

gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö. <sup>24</sup> Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntu nu udá' tu ni'a në'e yaga guí'a. Yénni'tërö huáca quégaquië', náca gaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

### *Ca gaca ulu'lágaca bönachi Israel*

<sup>25</sup> Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queëli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayá gaca yúgu'të bönachi biti' náca gaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusöla,  
 en ugúa le ruá' dö' nabága'gaca xzí'ini xi'sóë' Jacob.  
<sup>27</sup> Lë ni naca didza' dzaga gúnlena' légaquië'  
 cate' ugúa' dul-la' nabága'gaquië'.

<sup>28</sup> Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' gurö cazë' queë' xuz xtó'ogaquië'. <sup>29</sup> Tsaz runödzjë' Dios le runödzjë', en tsaz rulidzë' bönachi. <sup>30</sup> Ca na' naca queëli', zí'atëlö biti' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. <sup>31</sup> Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios

légaquië', ca ruhuéchi' ládxë'ë libí'ili' na'a. <sup>32</sup> Dios guléaj ládxë'ë yúgu'të bönachi para ila'dá'bagüë'ë xtídzë'ë, para gaca huéchi' ládxë'ë yúgu'të'.

<sup>33</sup> Zxöntë'rö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios. <sup>34</sup> ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödzej queë' Dios para gun bayudxi bi ubi'ë Dios que? <sup>36</sup> Yúgu'të le dë narúajgaca lu në'ë Dios, en taca lu në'ë, en náca gaca para uzi'ë xibéquequi. ¡Gácatíca'sö queë' Dios yöl-la' ba! ¡Ca' gaca!

## 12

### *Ral-la' udödi cuinru' quez queë' Dios*

<sup>1</sup> ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'në' Dios. <sup>2</sup> Bítí'rö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a ré'ënë' Dios gunli', lë na' raza ládxë'ë, en le naca idú.

<sup>3</sup> Na'a, tu' zoa le buzá' ládxë'ë quia' Dios, rea' yúgu'téli': Bití' gun ba zxön cuinli', le cabí ral-la' gunli', pero ral-la' gácali' nōxaj ladxi' ca ribequi ícjali', tsca naca yöl-la' réajlë' queéli' Dios le bennë' que queéli'. <sup>4</sup> Ca na' naca tuz idútë le naca cázaru', sal-la' zían le nagudi' dzágalenru', en calëga tuz

dxin tun yúgu'të le zían na' nagudi' dzágalenru',  
 5 lësca' caní naca queëru'. Sal-la' zianru' zóaru',  
 nácaru' ca tuz le naca cázaru' tu' nácaru' tuz len  
 Cristo, ate' que lë ni na' yúgu'tëru' nácaru' tuz turu'  
 len ia'turu'.

6 Tu turu' dë lu ná'aru' tu le bennë' queëru' Dios,  
 ate' nadzá'gaca tu tu tsca naca le buzá' ládxe'ë que  
 queëru'.

Bönni' na' Dios bunödzjë' queë' gu'ë didza' uláz  
 queë',

tsca réajlë'ë Lë', ral-la' gu'ë didza' bönni' na'.

7 Bönni' na' Dios bunödzjë' queë' gunë' xichinë',  
 dxí'ado' ral-la' gunë' dxin na'.

Bönni' na' Dios bunödzjë' queë' usédinë' bönachi,  
 dxí'ado' ral-la' usédinë' bönachi.

8 Bönni' na' Dios bunödzjë' queë' uzéajni'inë'  
 bönachi,

dxí'ado' ral-la' uzéajni'inë' légaquië'.

Bönni' bi unödzjë' que nu yúbölö,  
 idú ládxe'ë ral-la' unödzjë'.

Bönni' rinná bé'enë' bönachi,  
 idú ládxe'ë ral-la' gunë' caní.

Bönni' rácalenë' luzë'ë,  
 len yöl-la' rudzeja ral-la' gunë' caní.

*Yugu' le ral-la' gun nu nequi queë' Cristo*

9 Ral-la' idxí'ili' luzá'ali' idú ládxi'li'.

Buli'cá'ana le ruá' dö'.

Guli'güi' ládxi'li' gunli' le naca dxi'a.

10 Guli'dxí'i-guéquinë' luzá'ali'

ca nadxí'iguecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

11 Buli'típatica'sö ládxi'li', en biti' gácali' xöhuëdi.

Guli'gún xichinë' Xanru' idú ládxi'li'.

<sup>12</sup> Buli'dzeja tu' zoa le runli' löza.

Guli'cöz zxön ladxi' cate' bi riguí'i rizáca'li'.

Buli'lídzatica'sè' Dios.

<sup>13</sup> Buli'nödzej quégaca bönachi queë' Cristo  
tsca nayádzjaguequinë'.

Guli'güí' lataj ga ila'cuá' nupa ta'dxín queëli'.

<sup>14</sup> Guli'nábinë' Dios gunë' dxi'a  
quégaca nupa ta'bía ládxi'gaca libí'ili'.

Guli'naba gaca dxi'a quégaquië',  
en biti' udxíali' légaquië' dö'.

<sup>15</sup> Buli'dzójalen nupa tu'dzeja.

Guli'cödxilen nupa ta'bödxí.

<sup>16</sup> Guli'gaca tuz len luzá'ali'.

Biti' gun ba zxön cuinli',

pero guli'gún tsözxön yugu' bönni' nöxaj ladxi'.

Biti' guéquili' chinadéli'li' idútë yöl-la' réajni'í.

<sup>17</sup> Cuntu nu ubí'ili' que,

biti' guá'ali' dö' que nu ruá' dö' queëli'.

Guli'gún dxi'a quégaca yúgu'të bönachi.

<sup>18</sup> Channö huáca, tsca séqui'li', guli'cöz dxi'a  
len yúgu'të bönachi.

<sup>19</sup> Böchi' luzá'ado', biti' uzí' lëbili' bönachi la'  
libí'sili', pero guli'güí' lataj ubi'ë Dios quégaca  
bönachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios. <sup>20</sup> Lësca' caní rnna:

Channö zoë' nu bönni' biti' ridzáguië' li' dxi'a,  
en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

<sup>21</sup> Biti' gu'u lataj inná be'e le ruá' dö' li',



pero gunná be'e le ruá' dö' na',  
ugunu' dxin le naca dxi'a.

## 13

<sup>1</sup> Yúgu'téli' ral-la' gunli' ca ta'nné' bönni' yúlahui'. Dios caz budödë' lu ná'agaquië' yöl-la' unná bë' ná'agaquië', en nucu'ë xilátjagaquië' bönni' ni dë lu ná'agaquië' yöl-la' unná bë'. <sup>2</sup> Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xiguaia'. <sup>3</sup> Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga bití' ulu'zenë' li' bach, ben le naca dxi'a, ate' uruju' dxi'a lógaquië'. <sup>4</sup> Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xiguaia' nu ruá' dö'. <sup>5</sup> Que lë ni na' run bayudxi gunli' ca rnnë' bönni' na' dë lu në'ë, calëgasö tu' budödë' Dios lu në'ë gunë' libí'ili' xiguaia', pero lësca' para soa dxi ládxi'do'oli' lahuë' Dios. <sup>6</sup> Que lë ni na' ca' riguíxaj lázali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

<sup>7</sup> Guli'guíxaj yúgu'të bönachi le rál-la'li' quëgaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxjali'. Guli'gadxi nu ral-la' gádxili', en guli'gún bal nu ral-la' gunli' bal. <sup>8</sup> Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bë' xibá queë' Dios nu nadxí'i luzë'e. <sup>9</sup> Caní ta'nná bë' xibá na':

Biti' gunu' dul-la' le riguitsaj xibá que yöl-la' nut-saga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' sē ládxi'u le dē que luzó'o.

Yugu' xibá ni, en yúgu'të xibá ia'zíca'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

<sup>10</sup> Nu na' nadxí'i luzě'e biti' bi run que luzě'e le ruá' dö'. Caní naca, nu na' nadxí'i luzě'e run idú ca rinná bē' xibá queë' Dios.

<sup>11</sup> Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusi' loru' réajlë'ëru' Cristo. <sup>12</sup> Ga zóaru' na'a naca ca chi'i dzö'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'.

<sup>13</sup> Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxé'eru' luzá'aru'.

<sup>14</sup> Na'a, ral-la' un cuinli' lu icja ládxi'do'oli' ca náquië' Xanru' Jesucristo, en biti' gü'i ládxi'li' gunli' le rizë ládxi'li' lu yöl-la' bönáchisö queëli'.

# 14

## *Biti' ral-la' si' quídza'ru' böchi' luzá'aru'*

<sup>1</sup> Guli'güi' lataj nu réajlë' Cristo gun libí'ili' tsözxõn sal-la' biti' naca idú ca réajlë' nu na' Lë'. Biti' tít-lalenli' nu na' ca náca gaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të biti' ral-la' uzóë' tsölá'alö nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídze'ë bönni' na' rahuë' yúgu'të, tu' nazí lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz lí, rizi' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. <sup>6</sup> Bönni' na' runë' bal tu dza, runë' le bal para tseaj ládxë'ë Xanru', ate' bönni' na' biti' runë' bal dza na', para tseaj ládxë'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu", ate' bönni' na' biti' rahuë' yúgu'të, biti' rahuë' le para tseaj ládxë'ë Xanru', en rë'ë ca' Dios: "Xclenu'."

<sup>7</sup> Biti' zoë' nabanë' queëzë' nitúë' bönni' nabábalenë' rë'u, en biti' ratië' queëzë' nitúë' bönni'. <sup>8</sup> Channö zóaru' nabanru', para tseaj

ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

<sup>10</sup> Na'a li', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. <sup>11</sup> Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxíbigaca yúgu'të bönachi lahua' neda'. Ila'guixjõ' yálajdo' naca' Dios."

<sup>12</sup> Caní naca, uchi'a usöröë' Dios yúgu'tëru'.

*Biti' ral-la' gunru' ga ichixi iníguinë' böchi' luzá'aru'*

<sup>13</sup> Que lë ni na', bíti'rö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. <sup>14</sup> Nöz quézida' biti' bi dë le ráguru' le gaca gun ga bíti'rö nácaru' tsahui' lahuë' Dios, ate' röjlóz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bíti'rö náquië' tsahui' lahuë' Dios, queë' bönni' ni, caní naca.

<sup>15</sup> Channö rusuhu'innu' böchi' luzó'o, tu' ragu' le runi lë' biti' ral-la' gáguru', biti' runu' ca ral-la' gun nu nadxí'i böchi' luzé'e. Biti' bi ral-la' gagu' le gun ga gaca chopá ládxe'ë bönni' na', gútië' Cristo uláz queë'. <sup>16</sup> Que lë ni na', biti' bi gunli' le gun ga ila'nnë xihui' bönachi que le rusáca'li' queëli' naca tsahui'. <sup>17</sup> Cate' rinná bé'enë' Dios rë'u, biti' ruí'i ládxi'ru' le guí'aj gáguru', pero ruí'i ládxi'ru'

gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. <sup>18</sup> Núti'tës nu run xichinë' Cristo ca nácagaca lë ni, run le raza láchxë'ë Dios, ate' urúaj dxi'a lógaca bönachi.

<sup>19</sup> Que lë ni na' ral-la' gunru' le ilún ga gata' le ribequi dxi láchxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. <sup>20</sup> Biti' bi ral-la' gagu' le gun ga gaca chopá ladxi' nu na' nuzóë' Dios. Nácate lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. <sup>21</sup> Gácarö dxi'a cabí gagu' bëla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopá láchxë'ë, o le gun ga huöaj láchxë'ë ca réajlë'ë Cristo. <sup>22</sup> Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa láchxi'da'ahuë' lë' tu' nözi lë na' runi lë' dë lataj gunë', <sup>23</sup> pero bönni' na' raza chopá láchxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

## 15

### *Ral-la' gunru' le raza láchxë'ë böchi' luzá'aru'*

<sup>1</sup> Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la láchxi'gaca ca ta'yéajlë' Cristo. Biti' ral-la' gunru' le raza láchxi'ru' la' cuínsiru'. <sup>2</sup> Yúgu'tëru' ral-la' gunru' le raza láchxë'ë böchi' luzá'aru' para gaca dxi'a queë', en idipa láchxë'ë ca réajlë'ë Cristo. <sup>3</sup> Caní ral-la' gunru', tu' cabí benë' Cristo le guyaza

ládxë'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' guluí'i nupa gula'nnë xihui' quiu' Li', Dios." <sup>4</sup> Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxon ladxi', en ruhué tsahui' rë'u. Que lë ni na' zoa le runru' löza. <sup>5</sup> Rinábida'-në' Dios, Nu run ga ribözaru' zxon ladxi', en Nu ruhué tsahui' rë'u, gunë' ga gunli' tuz ca rusáca'li' queëli', para gácali' ca na' rë'ënë' Jesucristo. <sup>6</sup> Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo. <sup>7</sup> Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u. <sup>8</sup> Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxí' lu në'ë Dios unödzejë' quégaquië' xuz xtó'otu'.

*Yugu' bönachi izá'a ila'yöni didza' dxi'a*

<sup>9</sup> Bidë' ca' Cristo para benë' ga ila'gú'u Dios yöl-la' ba nupa biti' náca'gaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'  
lógaca bönachi idútë yödzölió,  
en gul-la' quiu' yöl-la' ba.

<sup>10</sup> Ga yúbölö nazúaj lu guichi lá'ayi le rnna:  
Libí'ili', bönachi idútë yödzölió,  
buli'dzëjalen bönachi queë' Dios.

<sup>11</sup> Ga yúbölö nazúaj ca' lu guichi lá'ayi le rnna:  
Guli'cu'ë Xanru' yöl-la' ba,

yúgu'tèli' biti' nácali' judío.  
 Guli'tséaj ladxi' Lë',  
 yúgu'tèli' zóali' idútë yödzölió.

<sup>12</sup> Lësca' caní buzúajë' Isaías lu guichi le rnna:  
 Ilá' lahui Nu nababa di'a dza queë' Isaí.  
 Gaca lo Nu na' para inná be'e nupa biti' nácacaca  
 judío.

Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë'  
 ga udzëjade'eli', en ga soa dxi ládxi'li' tu' réajlë'ëli'  
 Lë', en gunë' ga gaca idú ca runli' löza, tu' zóalen  
 yöl-la' huáca queë' Dios Bö' Lá'ayi libí'ili'.

<sup>14</sup> Böchi' luzá'ado'. Chinöz quézida' rúntica'sili'  
 le naca dxi'a, en dëda' yöl-la' réajni'i queëli' para  
 gaca uzéajni'ili' luzá'ali'. <sup>15</sup> Na'a naca' rugu ladxi',  
 ruzúaja' queëli' lu guichi ni, böcha'a, en rusá'a  
 ládxi'li' tu' zoa le buzá' ládxi'ë' Dios quia' neda'.  
<sup>16</sup> Que lë ni na' runa' xichinë' Jesucristo lógaca  
 bönachi biti' nácacaca judío, en runa' libán que  
 didza' dxi'a queë' Dios, para gaca ugu'a bönachi  
 biti' nácacaca judío lu në'ë Dios, nupa na' gurö  
 cazë' Dios Bö' Lá'ayi queë' Lë'. Ilácagaquië' ca tu le  
 rigú'uru' lu në'ë Dios, le raza ládxi'ë' Lë'.

<sup>17</sup> Na'a, tu' rúnlena' tsözxön Jesucristo dxin, dë  
 lu na'a tsaza ládxa'a ca naca le nuna' lu xichinë'  
 Dios. <sup>18</sup> Lësca' rurúguida' innía' ca naca lë na'  
 benë' Cristo lu na'a neda', benë' ga tun bönachi  
 biti' nácacaca judío ca rnna xtídzë'ë Dios. Lë ni  
 benë' Lë', bugunë' dxin didza' bë'a neda', en yugu'  
 dxin bena' neda'. <sup>19</sup> Lu na'a neda' bugunë' dxin  
 ca' le nácacaca bë' bulu'e lahui Lë', en yugu' yöl-  
 la' huáca zxön benë', en yöl-la' huáca na' queë' Dios  
 Bö' Lá'ayi le guzóalen neda'. Caní guca, gusí lahua'

runa' libán lu yödzö Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo. <sup>20</sup> Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguelë'ë lahui dxin zxön chinunë' bönni' yúbölö. <sup>21</sup> Ca bena' neda' naca ca na' nazúaj lu guichi lá'ayi le rnna: Ila'lé'e nupa nacua' ga cuntu nu ben libán queë' Lë', en ila'yéajni'i nupa catu caz bila'yöni ca naca queë'.

*Rë'ënë' Pablo tsejë' yödzö Roma*

<sup>22</sup> Que lë ni na', sal-la' zían luzuí gú'unida' guía' ga zóali', biti' guca guía'. <sup>23</sup> Na'a, chibudxi bena' dxin quia' yugu' lataj ni, en chirë'ënda' zían iz guía' ga zóali'. <sup>24</sup> Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tödi ni' huáca ugú'uli' neda' nöza. <sup>25</sup> Na'a ral-la' tseja' Jerusalén, tsöju'a tu le gácalen nupa ni' néquiguequi queë' Cristo. <sup>26</sup> Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi bönachi yechi' dzágagaca bönachi queë' Cristo, nacu'ë Jerusalén. <sup>27</sup> Gula'yaza ládxi'gaquië' bönni' biti' nácagaquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channö bönni' biti' nácagaquië' judío tu'zi'ë xibé le nácagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. <sup>28</sup> Que lë ni na', cate' údxi udöda' lu ná'agaca bönachi judío lë na' bulu'nödzjë' bönni' ni,



ní'irö töda' ga zóali' libí'ili' cate' tseja' luyú España.  
 29 Cate' guída' ga zóali', runa' löza idxínlena' yúgu'tè  
 le ruzí'iru' xibé ni'a que didza' dxi'a queë' Cristo.

30 Ni'a queë' Xanru' Jesucristo, en ni'a que yöl-la'  
 nadxí'i ruchízië' Dios Bö' Lá'ayi icja ládxi'do'oru',  
 ráta'yua' loli', böcha'ado', ulídzali'-në' Dios tsözxön  
 len neda', inábili'-në' gácalenë' neda'. 31 Guli'nabi-  
 në' Dios gunë' ga ulá' neda' lu ná'agaquië' bönni'  
 biti' ta'yéajlë'ë nacu'ë luyú Judea, en gunë' ga  
 ila'yaza ládxi'gaquië' ila'zi'ë lë na' tsöju'a lu  
 ná'agaquië' bönni' nácagaquië' queë' Cristo, nacu'ë  
 Jerusalén. 32 Guli'nabi-në' ca', channö naca ca  
 rë'ënë' Dios, gunnë' neda' lataj idxina' queëli'  
 len yöl-la' rudzeja quia', para uzí' ládxi'lëna'  
 libí'ili'. 33 Na'a rinábida'-në' Dios, Nu run ga zoa  
 dxi ládxi'ru', sóalenë' yúgu'tëli'. ¡Ca' gaca!

## 16

### *Tu'gapa Dios luzë'eguequi bönachi queë' Cristo*

1 Rigu'a-nu lu ná'ali' Febe, nigula zanru' dá'anu  
 Xanru'. Nácanu nigula huen dxin queë' Dios  
 dzáganu bönachi queë' Cristo nacuá' yödzö Cen-  
 crea. 2 Uláz queë' Xanru' guli'sí' lu ná'ali'-nu nigula  
 na', ca ral-la' ilún bönachi queë' Cristo. Guli'gácalen  
 lënu, unódzjali' queënu bíti'tës bi riquínnu. Lë  
 cázanu gúcalennu bönachi zián, en gúcalennu ca'  
 neda'.

3 Guli'gapa Dios Priscila, en Aquilo, nupa na'  
 gulunlen neda' tsözxön dxin queë' Jesucristo.  
 4 Chopë' ni gula'dödë' ga guzóa bönadxi ilátië' para  
 gulunë' ga cabí gátia' neda', ate' rea' légaquië':  
 "Xclenli", en calégasö neda', pero lësca' yúgu'tè

böchi' luzá'aru' nabábagaquië' gapa nacuá' bönachi queë' Cristo biti' nácagaca judío, t'ë légaquië': "Xclenli." <sup>5</sup> Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. <sup>6</sup> Guli'gapa Dios María, nigula na' bennu dxin zxön queë' Cristo ga ni rudúbili' libí'ili'. <sup>7</sup> Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

<sup>8</sup> Guli'gapa Dios Amplias, bönni' na' nadxí'ida', en néquinë' queë' Xanru'. <sup>9</sup> Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. <sup>10</sup> Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. <sup>11</sup> Guli'gapa Dios Herodiön, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. <sup>12</sup> Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. <sup>13</sup> Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'. <sup>14</sup> Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. <sup>15</sup> Guli'gapa Dios Filólogo, en Julia, en Nereo, en nigula zanë' Nereo

na', enca' Olimpas, en yúgu'të böchi' luzá'aru' ta'yéajlë'ë Cristo, nacua'lenë' légaquië'.

<sup>16</sup> Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacua' bönachi queë' Cristo luyú ni.

<sup>17</sup> Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplò, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacua' bönachi caní <sup>18</sup> tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. <sup>19</sup> Rizé didza' ca na' runli' ca rna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en calëga gunli' le ruá' dö'. <sup>20</sup> Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

<sup>21</sup> Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

<sup>23</sup> Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzö ni, rugapë' Dios libí'ili'. Böchi'ru'do' Cuarto rugapë' Dios libí'ili'.

<sup>24</sup> Rinábida'-në' Xanru' Jesucristo uzá' ládxë'ë queëli' yúgu'tëli' le gácalen libí'ili'. ¡Ca' gaca!

*Yöl-la' ba Dios*

<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. <sup>26</sup> Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

<sup>27</sup> ¡Ní'a que le benë' Jesucristo, gácatíca'sö yöl-la' ba queë' la's dui Dios, Nu rácatërö caz! ¡Ca' gaca!

**Didza' cubi rucá'ana tsahui'**  
**New Testament in Zapotec, Rincón (MX:zar:Zapotec,  
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25